

## LA LETARE PLUI BIELE

*Siôr Diretôr,*

*dopo in ca ch'ò ài chê di mandâj dôs riis ma mancul si dopra il penâl e pui àl pêse. Duncje, prin di dut 'o bramìn che cheste Lu cjati so redut in salût ancje parvie che il Friûl al à bisugne di penâj come chel di pre Toni Beline che ancje a nô nus fâs passâ qualchi biele ore in compagnie dai Soi scriz — cussì frescs e ferbinz — e chês jentradis — dai libris — une miei di cheâtre.*

*'O vin vût lis «Patris» e 'o vin sùbit capît che la cuistion 'e jè stade puartade a bon cun chel «Là». Podopo 'o vin let ancje su «Int Furlane» che, magari par cui ch'a nol cognos lis rôbis no jè masse clare cui ch'al pratindeve i becins, poben 'o sin contenz che le vebi risolte cussì ben e che «Patrie» 'e puedi lâ indenant — ma lis fadiis 'e saràn tantis — 'e prime ocasion 'o farin l'associasion e nûs plâs ancje le propueste de «Union des fuarcis furlanis te indipendense di ognune».*

*Cumò ch'ò soi inviade 'o lares indenant cuisà trop, tantis 'e son lis rôbis che vegnin tal ciâf e che si orès dîlis ma o fermi culî cu le sperance che le buine stagjon lu puarti ancje di chestis bandis.*

*Cu le sperance che j passi parsore ai sbàglios Lu saludin cun afiet e rispiet.*

*Felix e Marie Marchi*

*Tanc' salûts di me e Felix a duc' chei che lu judin tal lavôr a pro dal Friûl.*

Di dutis lis letaris che nus son rivadis, chê chî e jè la plui biele e la plui grande, parceche le à scrite chel omp che, judât de so femine, al à metude inpîs la «Patrie dal Friûl» e al à sconbatût par dute la vite pe nestre int. Plui di Pasulìn, plui di tanc' macacos di cumò, parceche al à sconbatût e pajât di persone cuanche jessi furlans nol ere une comuditât, une mode, une ande, ma un riscjo.

Te so letare al à capît ancje il parcè dal «La». No lu vin fat par tristerie e nus plâs che un omp come lui, ch'al à nâs fin, al veti capît cence tantis cjacaris là ch'a ere la veretât e là ch'a ere la fufigne. E nus slargje il cûr ancje a sinti che Felix e Marie a son dacordo su la propueste di unî dutis lis fuarcis furlanis «te indipendense di ognune». Al è il moment cumò plui di sinpri, cun tune Italie che va in sfas, che nus mande in malore e cun tun Friûl ch'al riscje di murî.

No sin faz par là a cirî santui di nissune sorte ma, s'al è un ch'al à dirit a fâj di santul `e Union Popolâr Furlane, al è il vecjo Patriarcje di Mediis. La so stime, il so agrât, la so fiducie, a son par nô il plui biel regâl, il plui grant laut.

«Lis fadiis a saran tantis» e scrif Marie. Jê che à provât prime di nô, e sa ancje dontri ch'a vegnin lis passions plui grandis, lis delusions e i tradimenz. No dai talians, che chêi si sborin ancjò dal 1866 dal Friûl, e nancje dai partiz talians, ch'a son di cuanche l'Italie e jè stade deliberade ch'a continui a mêtinuse tal comedon. A son plui dongje. E un ch'al scrif une letare come la vuestre, al sa ancje cui ch'a son.

Grassiis cetant dal vuestri afiet. Cuanch'ò vignarìn sù a Mediis o vignarìn cun plui coragjo, parceche o podarìn dî, in cussiense, di no vê tradît un ch'al à dade dute la so vite par un Friûl libar.

Mandi.

Avrîl 1979

pre Antoni Beline